

10. marts 2026

UPA 2026/143

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

3. aamma 7. klassimi alloriarfinni allattariarsornermi pinngitsuugassaanngitsunik misilitsissutininik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutininik pisariaqartunik saqqummiussinissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisit, malittarisassallu ukiumi atuarfiusumi 2027/28-mi atuutsilersinneqarsinnaanngorlugit naammassineqassapput.

(Inatsisartunut ilaasortaq Jørgen Rosbach, Demokraatit)

Tunngavilersuut

Demokraatit isumaqarput, Meeqqat atuarfiani nukarlerni aamma akullerni alloriarfiit naammassinerini, qitiusumik aalajangersarneqarlutik allattariarsornermi pinngitsuugassaanngitsunik misilitsissutit pillugit massakut aaqqiineq ersarissumik oqallisigineqarnissaanut piffissanngortoq.

Meeqqat atuarfiani nalilersuineri, atuarnerup tapersersorneqarnissaa siunertaajuaannartariaqarpoq. Nalilersuineq ilinniartitsisumut, atuartumullu sakkusaassaaq. Atuartitsinermit nukittorsaataassaaq, ulluinnarnilu atorneqarsinnaassalluni. Misilitsinneq qitiusumik aqutsineri sakkusanngorpat, ukkataqarneq atuartitsinermit nalilersuinermit nuutseratarsinnaavarput.

Atuarfimmi pissutsit, ataasiakkaallu pisariaqartitaat apeqqutaatinnagit klassini alloriarfinni aalajangersimasuni, atuartut tamarmik assigiissaakkanik misilitsissutininik misilittarnerat pillugit aaqqissuussineq atatiinnarippat ilumoorsinnaanngilaq. Ilinniartitsisorpassuit misigisimapput, qitiusumit aalajangersarneqarlutik misilitsittarnerit suliatigut kiffaanngissuseqarnermut killiliisut, misilitsinnermilu kusanartumik angusaqartariaqartutut misigisimanermik pisariaqanngitsunik pilersitsisut. Taamaalilluni meeqqat atuarfiani misilitsittarnerpassuit IMAK-ip uparuarnikuuai, ilinniartitsisullu ataavartumik nalilersuisarnerat akigalugu nalilersuineri misilitsinnerit ullumikkut inituallaarnerarlugit. IMAK-ip erseqqissaatiginikuuaa, atuartitsineri naliliisarneq ulluinnarni atuartitsineri annertunerusumik tunngavissillugu, misilitsinnerit ikilisarneqartariaqartut imaluunniit atorunnaarsinneqartariaqartut¹.

Tassunga atatillugu Danmarkimi ineriartorneq naleqquppoq. 2020-mi Folketingimi amerlanerussuteqartut politikkikkut isumaqatigiipput, taamanikkut nunami pinngitsuugassaanatik misilitsittarnerit taamatut isikkoqartillugit atorunnaarsinneqassasut. Misilitsinnerit atuartitsineri naleqassusaasa, misilitsinneri ilungersortitsisarnera, sakkussatullu atorneqartarnerisa isornartorsiorneqarnerat ilaatigut tunuliaqutaavoq.

¹ IMAK, Ilinniartitsisoq, nr. 2, april 2024)



Taarsiullugu "Folkeskolens Nationale Overgangstest/Meeqqat atuarfiani Ikaarsaarnermi Nunami misilitsissuseq", atuarfinnik pitsaanersiulluni tulleriiaarinissami tunngavissatut atornagu, atuartsinermi sakkussatut atorneqarnerusussaq atulersinneqarpoq. Tamanna ilaatigut isumaqatigiisummi, atortunilu Børne- og Undervisningsministeriaqarfimmeersuni allassimavoq².

Nalilersuinerilli tamaasa Danmarkip atorunnaarsinngilai. Misilitsitseriaaseq atuuttoq meeqqat atuarfiata siunertaanik naammattumik tunngavissiiingitsoq politikikkut nalilernerqarmat, aallaavik naleqqussarneqarpoq. Taassumap takutippaa, atuartsinerup pitsaassusissaanik, takunnissinnaanissamillu siunertaq taamaatinngikkaluarlugu, nunami misilitsitseriaaseq allanngorneqarsinnaasoq.

Demokraatit isumaqarput, nalilersueriaasitta pisariaqanngitsumik ilungersortitsinani meeqqat ilinniarnersa, atugarissaarnissaasalu tunngavissiiinissaasa qulakkeerneqarnissaanut uagut aalajangiisartutut ileqqorissaartumik iliuuseqarnissatsinnut, politikikkullu pisussaaffeqartugut.

Pinngitsuugassaanngitsunik alloriarfinni misilitsissutini atorunnaarsitsinissami pitsaassutsip imaluunniit akisussaaffeqarnerup atorunnaarsinneqarnissaanik isumaqanngilaq. Imaappoq, aqqummik allaanerumik toqqaassasugut. Tassunga atatillugu assersuutigalugu ataavartumik nalilersuisarnikkut, atuarfinni nalilersuinissami pilersaaruteqarnikkut imaluunniit nunami taamungaannaq toqqaalluni misissuinikkut malinnaanissami ersittunik, suliatigullu pitsaasunik sulit sakkussaqarnissaa Naalakkersuisut matumuuna qulakkeertariaqpaat.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

Inatsimmut, malittarisassanullu allannguutiniq suliaqarnermut atatillugu allaffissornikkut aningaasartuuteqarnermik siunnersuut kinguneqassaaq. Taakkua ilinniagartuut ukiumut sulinerat, imaappoq 500.000 koruunit missaat qaangissanngikkaat naatsorsuutigineqarpoq. Qitiusumik aqunneqartumik misilitsitseriaatsimik, tassungalu atatillugu allaffissornermik atorunnaarsitsineq isumalluutiniq atuiunnaartoqarsinnaassasoq ilutigisaanik naatsorsuutigineqartariaqarpoq. Tamanna tunuliaqutaralugu ataatsimut kingunissai aningaasartuuteqarnerunermik kinguneqassanganneqanngillat.

Namminersortunut aningaasatigut allaffissornikkullu kingunerisassai

Soqanngilaq.

Innuttaasunut aningaasatigut allaffissornikkullu kingunerisassai

Siunnersuut innuttaasunut toqqaannartumik aningaasatigut, allaffissornikkullu kingunissaqanngilaq. Atuartut atugarissaarnerunissaannut, ilikkagaqarnissaminnullu avatangiiserissaarnerunissaannut

² "Aftale om det fremtidige evaluerings- og bedømmelsessystem i folkeskolen", Børne- og Undervisningsministeriaqarfik, oktober 2021



siunnersuut siunissami ungasinnerusumi tapertaasinnaavoq, tamannalu ilaqutariinnut ataatsimullu isigalugu inuiaqatigiinnut iluaqutaassalluni.